

V E N D I M
Nr.478, datë 9.3.2001

**PËR KRIJIMIN E KOMISIONIT TË POSAÇËM TË KUVENDIT PËR VERIFIKIMIN E
LISTAVE DHE TË NDARJES SË ZONAVE ZGJEDHORE**

Në mbështetje të neneve 30 dhe 88 të Rregullores të Kuvendit, me propozimin e Grupit Parlamentar të Partisë Socialiste dhe të Grupit Parlamentar të Partisë Demokratike,

K U V E N D I

**I REPUBLIKËS SË SHQIPËRISË
V E N D O S I :**

Neni 1

Krijimi dhe kompetencat e Komisionit

1. Krijohet Komisioni i Posaçëm Parlamentar me qëllim verifikimin e procesit zgjedhor për zgjedhjet e përgjithshme të vitit 2001, në përputhje me kuadrin ligjor në fuqi.
2. Komisioni duhet të paraqesë në Kuvend raportin përfundimtar në lidhje me procesin përgatitor për zgjedhjet e përgjithshme të vitit 2001 dhe në veçanti për:
verifikimin e saktësisë së listave zgjedhore;
b) zbatimin e kërkesave të nenit 71 të Kodit Zgjedhor për ndarjen e zonave zgjedhore.

Neni 2

Përbërja e Komisionit

Komisioni përbëhet nga 6 anëtarë, 3 të propozuar nga pozita parlamentare dhe 3 nga opozita parlamentare.

Neni 3

Afati i veprimtarisë së Komisionit

1. Komisioni e fillon veprimtarinë e tij në datën e vendimit të Kuvendit për caktimin e anëtarëve të tij.
2. Veprimtaria e Komisionit përfundon me paraqitjen e raportit të tij para Kuvendit në seancë plenare, i cili duhet të paraqitet të paktën 50 ditë përpara datës së zhvillimit të zgjedhjeve për Kuvendin.

Neni 4

Fuqitë e Komisionit

Komisioni ka karakter verifikues të zbatimit të kuadrit ligjor zgjedhor, dhe mund të paraqesë në Kuvend amendamente, të cilat ai i konsideron të nevojshme, për ligje.

Neni 5

Kontrolli dhe verifikimi i dokumenteve

1. Komisioni ka të drejtë të ushtrojë kontroll mbi listat e zgjedhësve, mbështetur në dispozitat e Kodit Zgjedhor.
2. Komisioni përcakton njësitë zgjedhore, ku do të ushtrojë kontroll për listat e zgjedhësve.
3. Komisioni kontrollon nëse zonat zgjedhore janë ndarë në përputhje me nenin 71 të Kodit Zgjedhor.
4. Për realizimin e detyrave të parashikuara në këtë vendim, organet shtetërore, të ngarkuara me detyra në procesin zgjedhor, janë të detyruara të paraqesin dokumente dhe të krijojnë lehtësitë e

nevojshme.

Neni 6

Votimi

1. Komisioni, si rregull, merr vendime me konsensus. Në rast se konsensusi nuk realizohet, vendimet merren me shumicën relative të votave.

2. Radha e votimit në Komision bëhet sipas rendit alfabetik të emrit të anëtarëve të tij. Kryetari voton i fundit.

Neni 7

Këshilltarët teknikë

1. Komisioni me konsensus emëron katër këshilltarë teknikë.

2. Kriteret e përzgjedhjes së këshilltarëve dhe funksionet e tyre përcaktohen me vendim të veçantë të Komisionit.

Neni 8

Raportimet në Kuvend

Komisioni raporton në seancë plenare me kërkesën me shkrim të jo më pak se 10 deputetëve.

Neni 9

Raporti përfundimtar

Raporti përfundimtar i Komisionit duhet të miratohet nga Kuvendi me konsensus dhe, kur ai nuk realizohet, miratohet me shumicën relative të votave.

Neni 10

Zbatimi i vendimit të Kuvendit

Për zbatimin e vendimit të tij, Kuvendi ushtron të gjitha kompetencat e përcaktuara në dispozitat e Kodit Zgjedhor.

Neni 11

Fondi financiar i Komisionit

1. Nga buxheti i Kuvendit për vitin 2001, Komisionit i caktohet një fond i veçantë me vendim të Kryetarit të Kuvendit, mbështetur në propozimin e Komisionit.

2. Mënyra e administrimit të këtyre fondeve përcaktohet me vendim të veçantë të Komisionit.

Neni 12

Hyrja në fuqi

Ky vendim hyn në fuqi menjëherë.